

Na osnovu člana 61. Zakona o upravi („Službeni glasnik BiH“ broj: 32/02 i 102/09), člana 19. stav 2. tačka a) Zakona o Agenciji za identifikacione dokumente, evidenciju i razmjenu podataka Bosne i Hercegovine („Službeni glasnik BiH“, broj: 56/08) i člana 20. stav (2) Zakona o ličnoj karti državljana Bosne i Hercegovine („Službeni glasnik BiH“ broj: 32/01, 16/02, 32/07, 53/07, 56/08 i 18/12), direktor Agencije za identifikacione dokumente, evidenciju i razmjenu podataka Bosne i Hercegovine donosi

U P U T S T V O
O OBJAVI SERIJSKIH BROJEVA IZGUBLJENIH I UKRADENIH LIČNIH KARATA DRŽAVLJANA
BOSNE I HERCEGOVINE NA WEB STRANICI AGENCIJE ZA IDENTIFIKACIONE DOKUMENTE,
EVIDENCIJU I RAZMJENU PODATAKA BOSNE I HERCEGOVINE

Član 1.

(Predmet)

Ovim Uputstvom propisuje se način dostavljanja podataka i objave serijskih brojeva izgubljenih i ukradenih ličnih karata državljana Bosne i Hercegovine na web stranici Agencije za identifikacione dokumente, evidenciju i razmjenu podataka Bosne i Hercegovine (u daljem tekstu: Agencija).

Član 2.

(Nadležni organi i način dostavljanja podataka)

(1) Kantonalna ministarstva unutrašnjih poslova u Federaciji Bosne i Hercegovine, Ministarstvo unutrašnjih poslova Republike Srpske i u Brčko distriktu nadležni organ koji funkcionalno djeluje kao državna institucija (u daljem tekstu: nadležni organ), po donošenju rješenja iz člana 20. stav (4) Zakona o ličnoj karti državljana Bosne i Hercegovine („Službeni glasnik BiH“ broj: 32/01, 16/02, 32/07, 53/07, 56/08 i 18/12), dužni su bez odlaganja dostaviti podatke o poništenim ličnim kartama radi objave na web stranici Agencije.

(2) Na osnovu pravosnažnog rješenja iz stava (1) ovog člana službenik nadležnog organa dužan je promijeniti status lične karte u status izgubljena ili ukradena. Promjenom statusa lične karte u izgubljena ili ukradena podaci postaju vidljivi na web stranici Agencije. Podaci iz stava (1) ovog člana, koji se dostavljaju, odnose se na serijski broj poništene lične karte i nadležni organ koji je tu ličnu kartu izdao, odnosno poništio.

(3) Podaci se Agenciji dostavljaju trenutno, elektronskim putem, prema tehničkim rješenjima koje osigurava Agencija.

Član 3.

(Objava podataka)

(1) Agencija će odmah po prijemu podataka iz člana 2. ovog Uputstva na svojoj web stranici izvršiti objavu dostavljenih podataka.

(2) Serijski broj lične karte koja je u zakonom propisanom postupku poništena ne može se više koristiti.

(3) Podaci iz stava (1) ovog člana dostupni su na web stranici Agencije do roka važenja lične karte koja je poništena.

Član 4.

(Prestanak primjene dosadašnjih propisa)

Stupanjem na snagu ovog Uputstva prestaje primjena Uputstva broj:01/1-288/03 od 19.05.2003. godine donesenog od strane Ministarstva civilnih poslova BiH u dijelu koji se odnosi na postupak objave podataka o izgubljenim i ukradenim ličnim kartama.

Član 5.

(Stupanje na snagu)

Ovo Uputstvo stupa na snagu osmog dana od dana objavljivanja u „Službenom glasniku BiH“, a primjenjivat će se od dana donošenja Odluke o početku izdavanja ličnih karata sa elektronskim memorijskim elementom.

Broj 15-01/02-2-92/13
23. januara 2013. godine

Direktor
Mr. **Siniša Macan**, s. r.